

國朝畿輔詩傳

國朝畿輔詩傳卷四十二

長洲陶 樸冕薌輯 任邱邊浴禮袖石校

紀昀

昀字曉嵐號春帆獻縣人乾隆十九年進士歷

官協辦大學士諡文達有文達公遺集十六卷

阮元漢學師承記公世爲河間著姓祖天申有  
善行父容舒官姚安太守少而奇穎讀書過目  
不忘年二十四乾隆丁卯科解元甲戌成進士  
授庶吉士散館授編修己卯充山西鄉試正考  
官壬午提督福建學政戊子授貴州都勻知府  
晉侍讀學士緣事累誤發烏魯木齊効力辛卯  
召還授編修三十八年擢侍讀

命爲四庫全書館總纂官丙申授侍讀學士充

文淵閣直閣事日講起居注官己亥擢詹事  
旋晉內閣學士壬寅授兵部右侍郎仍兼直閣

事改任不開缺乃異數也甲辰充會試副考官  
壬子畿輔水災奏請截留南漕萬石設十賑賑  
飢全活無算嘉慶元年丙辰充會試正考官轉  
兵部尚書癸亥六月以八旬開秩上遣  
官資  
強暴捆縛受污不屈見戕者例無旌表臣謂捍  
刃捐生其志與抗節被殺者無異如忠臣烈士  
誓不從賊而紮縛把持雖使跪拜可謂之屈膝  
賊廷哉請  
勅交大學士九卿科道公議  
與未被汚者畧示區別量予旌表大學士等議  
奏如兇手在兩人以上照係孱弱難支與強奸  
被殺者一體予旌飭交各督撫勘明情形請  
旨定奪  
報可乙丑正月奉  
旨調禮部尚書協辦大學士加太子少保管國  
子監事十五日卒於位年八十有二  
祭葬  
予諡文達公於書無所不通尤深  
漢易力闢圖書之謬  
四庫全書提要簡明目  
錄皆出公手大而經史子集以及醫卜詞曲之  
類其評論快與闡幽詞明理正識力  
在王仲寶阮孝緒之上可謂通儒矣

又序公受兩朝知遇有所疏奏皆不徹閒雅足爲對揚軌儀請試士子春秋文以左氏傳立論輔以公羊穀梁二傳而廢胡氏傳尤爲有功經學他所著撰體物披文不襲時俗所爲詩直而不伉婉而不佻抒寫性靈醞釀深厚未嘗規撫前人罔不與古相合蓋公鑒於文家得失者深矣公著述甚富不自哀集故多散佚公之孫香林比部搜輯得詩文集十六卷梓以行世元以科名出公門生門下初入都公見元所撰書稱許之自入詞館聞公議論益詳蓋公之學在於辨漢宋儒學之是非析詩文流派之正僞主持風會非公不能至於此集雖非公所自勒然亦足以覩全量矣

劉權之序公天資超邁目數行下掇巍科入翰苑當時卽有昌黎北斗永叔洪河之目及在翰林署齋戒於敬一亭得永樂大典值宿之暇翻閱一過記誦大半乾隆三十七年朱笥河學士奏間高宗純皇帝勅輯永樂大典並蒐羅遺書特命公總纂四庫全書總目

俱經一手裁定公孫香林西曹梓文集十六卷  
以權之猥荷鑒賞則弟子行最久屬序憶受知  
後多聞緒論文才力宏富絕不矜奇好異總以  
清氣運之譬滿屋散錢逐手入串李杜之光燄  
燕許之手筆盡歸腕  
下哀然一代文宗也

聽松廬文鈔或謂紀文達公博覽淹貫何以不  
著書余曰文達一生精力具見於四庫全書  
提要又何必更著書今人目中所見書無多故  
偶有一知半解便自矜爲創獲不知其說或爲  
古人所已言或爲昔人所已駁其不爲牀上之  
牀屋下之屋者蓋亦鮮矣文達之不輕著書正  
以目逾萬卷胸有千秋故也或又言文達不著  
書何以喜撰小說余曰此文達之深心也蓋考  
據辨論諸書至於今已大備且其書非畱心學  
問者多不寓目而裨官小說搜神誌怪談狐說  
鬼之書則無人不樂觀之故文達卽於此寓勸  
戒之方含箴規之意託之於小說而其書易行  
出之以諧談而其言易入然則閱微草堂筆記  
數種其覺夢之清鐘迷津之寶筏乎觀者慎無

以小說忽之

蒲褐山房詩話君閱覽博聞才情華瞻少日已爲史文靖公劉文正公激賞及再入詞垣適以詞臣奏請將永樂大典內人間罕覩之書鈔錄流布旣而詔求天下遺書開四庫館令君與陸君錫熊總司其事考異同辨真僞撮著作之大凡審傳本之得失撰爲提要進呈御覽存目以設之分繕七部貯於文淵閣圓明園熱河盛京及揚州金山杭州諸處嘉惠來學又加以提要二百卷使讀者展閱了然蓋自列史藝文經籍志及七畧七錄崇文總目諸書以來未有閱博精審若此者蓋文治之極隆而儒生之榮遇也逮爲禮官之長恭遇高宗純皇帝御宇六十年行內禪之儀進冊授寶宏規盛事皆千古禮儀之所未備禮臣參稽經訓綜以會典斟酌進呈均蒙俞允次第舉行普天同慶亦君所擬定者爲多君黼黻昇平甄綜羣籍故其應制之作雖爲詞苑

所宗而於尋常所著不復珍惜成編茲於館課  
偶存中錄存梗概已無愧於燕許揚劉而試帖  
體乃國家所以取士大小試無不  
用之故所錄特多俾爲士林準則也  
紅豆樹館詩話昔蘭泉師輯湖海詩傳時文達  
公全集尙未板行故僅就平日所錄應制諸作  
入選是集公孫香林觀察於嘉慶十七年校梓  
公生平精力已萃於四庫全書茲集特泰山  
之配林耳然皆直抒胸臆不事雕飾而天姿超  
邁間見博綜風雅之旨動合古人故著錄較多  
云按公高祖名坤字厚齋明隆慶中諸生有經  
世志久而不遇崇禎壬午卒生平憂時感遇託  
之於詩集名花王閣原本燬於兵燹乾隆中其  
曾孫容舒檢錄殘藁付梓翁覃溪學士稱其佛  
鬱沉痛與桐城錢飲光相頡頏此集晚出諸選  
家概未登錄附載數章於此所聞云出門復入  
門憂心日草草何時黃巾平骨月得相保治亂  
相倚伏此理信穹昊河清會有期恨我生太早  
側聞間外事功罪日紛擾恩怨亦人情吾敢悖  
諸老且願緩報施稍待風塵掃聞孫閣部罷歸

云岌岌。前成朝。朝起戰雲如何大。丞相翻作  
故將軍。國向多清議。議權仍屬聖君。廟堂左計  
或恐是傳聞。半夜云。半夜倉皇接報書。開緘拍  
案一驚呼。諸公至此。吾何望。天道如斯。古所無  
敲枕沉吟。連夢寐。挑燈絮問怪妻孥。披衣啟戶  
看乾象。黯黯寒星數。點孤哭。董天士云。事事知  
心。自古難平生。二老對相看。飛來遺札。驚投箸  
哭到荒村。欲蓋棺。殘藁未收。新畫冊。餘貲惟賣  
破儒冠。布衾兩幅。無妨殮。在日黯。妻不畏寒。五  
岳填胸氣不平。談鋒一觸。便縱橫。不逢黃祖真  
天幸。會怪嵇康太世情。掃榻有時邀月入。杖藜  
到處避人行。料應塵海無堪語。且試驂鸞問紫  
清。百結懸鶉兩鬢霜。自餐冰雪。潤空腸。一生惟  
得秋冬氣。到死不知羅綺香。寒蕢村醪。纔破成  
老樓僧舍。是還鄉。只今一瞋。無餘事。肯要青蠅  
作弔忙。十年相約。謝風塵。天地無情。隕此人。亂  
世逃禪。聊解脫。衰年哭友。倍酸辛。關河決。堦連  
兵氣。齒髮蒼浪。寄病身。泉下有靈。應念我。白楊  
孤冢。亦傷神。土寇夜至。掠古琴。去云。廿載懸塵  
壁。何人問此琴。可憐兵火裏。此輩乃知音。枯桐



閱歲多神物含靈爽正直七條弦汝彈恐不響  
塞下山云關前衰草冷烟迷關內驂驢十萬曉  
且喜年來邊塞近  
紅閨不用夢遼西

擬古

十三學擊劍十四能談兵十五買駿馬慷慨從軍行路  
逢魯朱家車騎何縱橫邀我登高堂置酒吹竽笙感君  
意氣重亦欲傾平生丈夫誓許國邊徼方長征

魯連天下士本自澹宕人一朝感世故高義橫天雲力  
排新垣衍長揖平原君事成竟高蹈翩然還隱淪我讀  
短長書感激爲沾巾千金亦易辭所貴却秦軍

贈戈芥舟

長鯨跋浪出萬里滄溟開三山岌欲動倏忽生風雷夫  
君振高節早歲馳雄才胡爲久蹉跎幽鬱使心哀綠草  
春離離感激黃金臺

飢鷹思掣鞚疲馬思疆場壯志雖不遠猛氣猶飛揚緬  
懷古烈士撫已多慨慷不有辛苦人焉識勞者傷長歛  
發哀彈惻惻沾衣裳

食棗雜詠

八月剝棗時檐瓦曬紅皺持此奉嘉賓爲物苦不厚豈  
知備贄謁兼可登籩豆桂子不可食馨香徒滿袖

東海逢安期食棗大如瓜物類或殊常聞者以爲誇豈

知玉井蓮乃有十丈花鯤鵬談變化焉可疑南華

送內子歸寧

門外馬蕭蕭僕夫已引輕之子有遠行向曉征輪動中  
懷忽振觸展轉增沈痛昔日爾歸寧阿母倚門送舉手  
引諸孫瀕行猶撫弄今日爾歸寧撫棺惟一慟秋塵生  
總幘蛛網垂梁棟爾母雖他鄉還家悲喜共我母隔重  
泉耿耿空魂夢入門三太息淚漬麻衣縫

送汪劍潭南歸

探珠合浦水采玉崑崙邱天琛世所羨豈不窮冥搜陸  
離燦百寶安得一一收所以盛明世奇士時淹留常情

多感慨達識無怨尤遇合各有期蘭菊殊春秋汪子負  
奇調巨海吟蒼虬風波偶踰蹬歸買淮南舟長安居不  
易無計爲子謀潞河千里水送子心悠悠努力勤自愛  
舊業重研求駿足皆得路豈獨遺驂驪三年一彈指挾  
策來

皇州嵒巖蓬山頂偕子驂鸞游

題同年謝寶樹小照

往者詣公車爾我憐同調馬上慘綠衫翩翩兩年少中  
間各仕宦人事紛繚繞彈指廿六載駒隙忽停照秦中  
暫相遇我正適邊徼草草敘悲歡未暇觀顏貌生還荷  
聖慈重待金門詔君亦方內遷握手再一笑自憐雙鬢

改對鏡愁焉悼看君鸞鶴姿尙與當年肖寫眞入畫圖  
明月清光耀花樹陰翳如微風吟萬竅朱顏發春醅宴  
坐姿歌嘯自是丰神佳非關畫手妙盛衰寧有常年齒  
何足較展卷一慨然榮枯隨所蹈

馮寶庵侍御繪種竹圖賦贈

通明挂朝籍不礙松風夢天懷澹宕人雅尙自殊衆馮  
公負奇穎廊廟資梁棟紫霄登禁近丹綵司傳奉乃於  
退食閒竹效王猷種閒庭翠影交虛牖涼飈送蕭然悅  
清曠邀爾謝喧闐雖復在朝市不異棲巖洞高韻寫丹  
青逸氣無羈絆憶我掌烏臺鼎彝識典重心儀命世才

擬薦明時用誰知恬靜情頗異彈冠貢鶴樂日從容多  
冠甘侍從未羨沈侍郎夜遊騎白鳳足知孤直志真與  
此君共非徒託畫圖姑以資清供憶我少年遊意氣恒  
飛動老來知斂退塔樣參無縫公餘日枯坐如以鉤收  
永惜無竹里館得句閒吟誦何當訪高齋馬遣吳童控  
嘯詠招七賢往來邀二仲青鸞拂纖尾綠蟻酌深甕閱  
音修篁下風月資嘲弄形骸兩俱忘一笑同豪縱

題汪銳齋蕉窗讀易圖

詩書春秋禮掇自秦餘燼人事紀其常天道於斯蘊易  
從象數生推闡陰陽運天道發其微卽爲人事訓消息

四庫全書  
卷一百一十二  
一  
察往來剛柔明逆順示以從迪吉戒以凶悔吝軌轍徑  
不迷坎窞車宜慎茲實導庸愚豈但傳才俊徒以類術  
數頗爲諸儒素職祥焦京衍讖緯哀平溷鑪鼎借坎離  
生尅岐壬遁良由易道廣各執一端論小技矜別傳畸  
士遂旁訛譬如鷄飲水祇自足其分宜知江海流環絡  
萬州郡經神起北海經籍道一振隋聖固云遙去古終  
爲近其釋乾初九證以歷山舜明明四聖心玩象知可  
信云何王與韓清言標魏晉沿及宋淳熙恍惚彌難問  
楊簡王宗傳妙悟求方寸公然啟禪關密爾談心印橫  
流極李贊詭辯驚蘇潛梵筌共相參義畫何曾認易家

惟此疾癥結醫難診汪子沈潛人嗜古自髫髻時披黃  
卷吟未悵青衿困百氏擷膏馥六藝漱芳潤洙泗舊章  
編研索志尤奮初如目擬鵠久漸心游刃訓詁溯根原  
考證求詳慎自尋理窟深戒鬪談鋒迅恒虞侈空談聖  
籍畱遺恨沈思閱幾秋過眼倏一瞬讀易偶成圖吳霜  
已點鬢會我典春闈愛爾雄文陣竟從萬馬中得此千  
里駿嘗於秋雨餘庭戶無塵坊聽講中孚爻遺文旁摭  
招喜其經詁經如驂之有靳仙班纔註籍歸路俄發軔  
持圖索我題我老目生暈秋燈黯黯綠勉爲排聲韻憶  
編四庫書異學多所擯力守儒墨防頗持法律峻冀求



千載心敢避經師愠今日頭欲白筆鋒嗟已鈍年來所  
相士似子良云僅期子付衣鉢努力其精進

伊雲林光祿左手寫經圖

青年負盛氣白首消壯心誰以桑榆景辛苦翰墨林况  
乃鑿齒痛久作莊舄吟平時扛鼎筆苒弱安能任先生  
大智慧妙悟參觀音千手如一手思議不可尋靜者忘  
其靜枯木僵寒岑動者隨其動呼吸磁引鍼右詘左自  
支仍此揮綠沈徐公巾箱本興到時摹臨居然下帷士  
惜此分寸陰殆於受書日汲古直至今丹青偶寫照展  
視正我襟譬如見獵喜亦復思從禽所恨七旬餘兩鬢

霜雪侵公餘退食暇睡思恒不禁且於撥鎗訣講肄原  
米深不求分黑白焉辨晷與黔有手懶拈毫歲月空駸  
駸愧君半支廢書字猶成金舉觴擬自罰恨不能酌斟  
嚴冬雪壓屋寒氣方蕭森譙樓欲三鼓呼婢理夜衾姑  
以無成虧託彼不鼓琴

倪鴻寶先生小桃源詩真迹用覃溪前輩韻題後  
筆墨意蕭疎宛與高人對頗疑揮翰手或是孫登輩不  
然謝幼與宜畫邱壑內宜知鐵骨翁生逢龍戰會偶遇  
輞川圖閒詠嚴陵瀨一本知難支激而談世外京貫石  
紛呶黃農惜不逮溫然忠厚旨未失風人派碧血悵久

埋黃絹今猶在憑看淡墨中力透雲牋背

曉發泰安距泰山二十五里不及登

游山不游岱一覽羣峯青有如研百氏而不窺六經古  
人訪五嶽不憚萬里行云何跬步地蠟屐斲一停壯遊  
良所愛于役自有程薄暮宿泰安驅馬雞三鳴是時日  
未出東望清冥冥少焉宿靄破突兀天孤撐白雲流潏  
決纔挂山腰橫想見萬仞頂咫尺捫晨星俯視海氣白  
天水相合并鴻濛破一罅澗瀆朱霞明陽烏矯翼上浪  
捲羲輪頽蕩滌蛟蜃氣寥廓天地清安得排雲上一快  
磊落情但愁奇偉景使我心目驚風雲月露手大敵非

所嬰登高不得賦瑟縮難爲形茲游雖未暇且免羞山  
靈願讀十年書萬卷儲精英培養雄直氣鬱勃胸中生  
振策天門上奮袂超崢嶸與酣吐奇語高詠羣神聽  
然千山響下界驚雷霆

盤門舟次別申圖南時圖南公車北上

水氣夜蒼然寒月墮前浦客子念將離切切挑燈語經  
年思一晤握手傾肺腑相見轉茫然紛如春繭緒鷄鳴  
星漸稀黯淡天欲曙揮手在須臾倚棹兩悽楚我輩風  
雲志豈復效兒女意氣感人心惻惻不自主之子縱橫  
才功名夙自許去去勿復言老人方望汝長安舊賓客

此日各處所南北天一涯爲言力自努長河水悠悠今  
夕吳江渚欲知遠客心搖似舟邊櫓

過嶺

大雪羈荒榛凍雲壓高樹衝寒上高嶺岡巒莽回互蒼  
然暝色合四望疑無路迂曲得人蹤一綫微通步仰睇  
鬱嶒嶸俯窺杳烟霧隔澗見行人蠕蠕似蟻附高者木  
杪縣卑者草際露前者僂而援後者聳而赴石磴滑屢  
顛林風吹欲仆徒侶遞相呼十步九回顧慄然悸神魂  
失足愁一誤側聞定鼎初狂童此負固桓桓李文襄轉  
戰實茲處仰攻彼尙克徐行今乃怖人生才地縣宜止

恒沙數丈夫志四方感激酬知遇仗鉞良未能叱馭吾  
其庶甞勉趣役夫去去無多慮

交坑夜泊

暝色從西來亂山青莽莽灘河戒夜行薄暮收雙槳連  
朝困登陟茲夕遂偃仰飛泉樹杪來一瀉落百丈徹耳  
鳴琤琮頗使心神爽荒戍纏薜蘿孤卒友颺颺喜無鉦  
鼓音亂此環珮響夜靜人語稀沙岸自來往流雲漸欲  
破山月微微上兩月纓上塵浩歌濯瀆滌

與周閣章圍棋遂成長句

平生苦爲吟詩瘦未向棋經尋句讀閒中游戲資一笑

落子丁丁消白晝據枰乍似賁育勇脫手全如風雨驟  
不須步伐約三軍搏戰直前相踐蹂畧同穴鼠勇怯爭  
何必率然首尾救忽然趨利瞰上將俄已合圍逐窮寇  
勢堅猶作虬蟬撼局蹙偏憐困獸鬪紛紛潰卒指可掬  
子子餘生出自竇游魚莫笑釜底逃巨網或亦吞舟漏  
路盡已愁車擊轂尋隙仍思風入腠斂子方歎輿尸歸  
抵掌不殊凱歌奏外內空構鄭門蛇王霸終分陳寶碓  
枯棋三百通兵家九等元機自天授縱橫方卦盡變態  
思苦不辭心腎鏤爛柯未必遇神仙木鑽去聲石盤何日  
透我曹無事坐孤館紋楸一局邀朋舊喧闐雖似劍逐

蠅無心誰識雲出岫淪漣風水適相遭穀文蹙起微波  
溜須臾境過兩俱忘風本無聲水不皺勝固欣然敗亦  
喜東坡妙語誠非謬試從能者較得失佩劍何妨分左  
右興闕客散自下帷微風一綫沈煙逗

寄壽徐筠亭先生

生日詩列吟卷中誰歟倡者羅江東此風一扇八百載  
吳牋擘畫丹沙紅震川先生稱鉅手更以壽序煩鐫工  
銀屏錦帳入青簡文格破碎從嘉隆生平偃蹇懶爲此  
捉刀往往聽兒童胡爲一旦破戒律手題長句封郵筒  
筠亭先生天下士牙籤萬軸羅心胸暮年戒養古曾閔



早歲爲收今黃龔行年七十老無恙蒼顏白髮柯青銅  
我家舊宅近橫海早聞父老談清風到閩兩載未相識  
伊人秋水無由從赤霄麟鳳衆所望尺素頻托微波通  
親撰杖履吾尙願何況片楮勞雕蟲樂全先生鐵拄杖  
寄詩原有東坡翁其人顧視何如耳宜云一律從同同  
梅崖居士今鉅筆蹴踏揚馬如奴僮頗聞文字慎許可  
寸莛未許攏洪鍾獨於先生一傾倒昌黎東野相雲龍  
定知亦有文爲壽華鯨相與鳴春容老人黃公今健否  
鵬冠憤憤非眞顰此客嚴冷頗難致祝君想亦親扶筇  
因君問訊道好在爲我一勸琉璃鍾

松巖老友遠來省子偶出印譜索題感賦長句

陽關西出二載餘歸來再直承明廬艱難坎坷意氣減  
閉門漸與交游疎西風昨夜到梧葉淒然白露滋庭蕪  
軒車雖復謝時輩觴詠頗亦思吾徒門前剝啄者誰子  
昂藏老鶴清而癯故人忽自天半落踉蹌屐遙相呼  
憶昔把酒談篆刻布衣之舊晨昏俱迢迢一別十六載  
秋鴻未寄尺素書誰知古道淡以久形骸雖隔心相於  
聞我生還如再世霜華漸欲侵髭鬚常恐從此相見少  
不辭策蹇紆長途我聞握手再三歎蒼茫百感交斯須  
誰言草野貧賤士乃能不逐炎涼趨古云書畫繫人品

天然高致非臨摹豈知一藝能造極立身亦與常人殊  
向來知子殊不盡但誇鐵筆鐫蟲魚題詩擬續印人傳  
較工論拙徒區區舊題松巖印譜有他年繼續印人傳  
識天下士此人此藝今皆無幸子老眼尙如鏡莫辭寸  
鐵磨昆吾晴窗爲我鏤山骨長揖韻籀相爭馳他年片  
石以人重姓名託子畱寰區

己卯秋錢塘沈生寫余照先師董文恪公爲補幽  
篁獨坐圖今四十年矣偶取展觀感題長句

我家京國四十年俗情入骨醫難痊堂多隙地居無竹  
此君未省會周旋先生此畫竟何意忽然置我幽篁間

當時稽首問所以淋漓潑墨笑不言母乃怪我趨營猛  
諷我宴坐娛林泉拈花微旨雖默解拂衣未忍猶畱連  
人生快意果有失一蹶萬里隨戎旃孤城獨上望大漠  
洪濤沙氣黃無邊慨然念此畫中景有如縹緲三神山  
枯魚書札寄魴鱖風波一失何時還玉門誰料竟生入  
鳴珂又許趨仙班歸來展卷如再世羊公重認黃金環  
少年意氣已蕭索傷禽寧望高飛翻但思臣罪當廢棄  
驂鸞忽躡蓬萊轡友朋知己尙必報况乃

聖主

恩如天文章雖愧日荒落江海才盡非從前石渠天祿  
勤校錄尙冀勉滌平生愆以此躊躇未能去故人空寄

歸來篇湖州妙蹟挂素壁風枝露葉橫蒼烟彈琴長嘯  
縣明月相從但恐終無緣畫雖似我我非畫對之仍作  
他人觀盤陀石上者誰子杳然相望如神仙

羅雨峯歸帆圖

胸中奇氣蟠蛟螭蹉跎乃作老畫師逢時以畫已自惜  
况於落拓難逢時秋聲昨夜到庭樹蒼苔滿院吟蟲悲  
墨君堂冷人蹟少牡丹終不塗胭脂禿毫敗楮自寫照  
孤帆一片天之涯斜陽不語光錯落寒雲無色氣慘悽  
數筆草草暈淡墨中有萬古騷人思我來相訪掃塵榻  
默默坐讀無聲詩嗟我之子且小住吾曹數輩猶追隨

他時鼓棹烟水外沙鷗蘆雁知君誰

題吳香亭古藤詩思圖

藤爲新城王文簡公手植

三才萬象窮梳爬詩翁秀句含天葩瓊箋九萬寫不盡  
餘香散作庭中花天矯老幹三十尺蛟螭佩強相盤拏  
炎天鬱鬱張翠幄春風裊裊吹紫霞老仙一去六十載  
孤根半載莓苔遮烏衣燕子銜落蘂蒼涼已使人咨嗟  
云何瞥眼更小幼翦伐不遺留枯槎花神夜泣紅淚盡  
離魂何處愁天涯豈知一物有顯晦冰霜閱徧逢春華  
蘭成宋玉遠相繼舊宅仍是詞人家鶴林天女忽自返  
嫣然一笑窺窗紗始知神物終有待人間斤斧焉能加

昨秋乘興偶過訪滿庭綠影紛橫斜三生石上恍相遇  
牽蘿翠袖真無差所惜不及花正放恨無羯鼓冬冬擗  
相期待取蜚英會醉看珠璣垂檐牙淵明何事又卜宅  
徒聞空館棲昏鴉有形自古無不盡電光過眼飛金蛇  
長留但有文章壽流傳往往千年賒敬愛寺藤無寸蔓  
東川詩句今猶夸此藤縱落他人手飄零賤視如蓬葭  
得公一記足不朽其壽已比恒河沙漁洋有靈應起舞  
吾花不枉重萌芽惜哉手種羊城樹欲子見之山川遐

蜨翅祝

羅浮蛺蝶翅盈尺五色天衣雲錦織偶然仙蛺落翠山

風雨多年今化石誰歟琢硯吾得之惜無好句題烏絲  
何當喚起謝無逸倩寫柳絮梨花詞

題陸耳山副憲遺像

性情嗜好各一偏如火自熱泉自寒文士例有山水癖  
惟余茲事頗無緣東嶽嶢嶢倦躡屐西湖浩渺嬾放船  
幔亭峯下三度宿亦未一訪虹橋仙我去君來握使節  
乃能煮茗千峯巔旁人錯認陸鴻漸前身猜是楊大年  
羨君雅調清到骨笑我俗病醫難痊有如帶劍異左右  
定知結佩分韋弦寧識相與無相與此故不在形骸間  
蓬萊三島昔共到開元四庫會同編兩心別有膠漆契



多年皆似金石堅一旦東流驚逝水至今南望悲荒阡  
丹青忽見形髣髴存亡彌覺情纏綿况復衰翁已七十  
黑頭久矣成華顛新交日換舊交少盤柄往往殊方圓  
緣此傷心感曩昔披圖相對不忍還題詩半夜昏燈綠  
招魂何處霜楓丹老屋驚寒風瑟瑟深冬釀雪雲漫漫  
徘徊不寐坐長歎伊誰解識余辛酸

張南華先生夏木清陰圖爲伊墨卿題

麓臺先生吾未見少年猶識南華翁當時畫蹟家家有  
視之亦與尋常同東山夫子今北苑乃獨心折於此公  
謂其繪事有縣解千變萬化猶神龍不離法亦不立法

意之所到無畦封卽一題署一跋譚不求工處天然工  
祇恐雲烟一過眼百金一紙求無從星霜荏苒五十載  
老仙已返東海東日久論定始見貴位置擬入神品中  
僉曰妙在六法外追黃公望凌王蒙惜哉縑素日零落  
廣本雜出真稀逢畫家欲作無李論辨別往往煩南宮  
君從何處得此軸蒼嵐蔥鬱綠樹濃長夏溽暑張素壁  
乍覺滿室生清風忽憶斯與堂中坐東山夫子堂名見公偶遇  
裴司空韓門弟子皆在席一時同把琉璃鍾酒酣索紙  
潑墨瀟立成七幅青芙蓉手持一一分座客左顧右盼  
意氣雄前輩風流宛如昨雪泥無處尋飛鴻徘徊對此

三太息彈指歲月何怱怱豈但一卷斷橋景年深久矣  
飽蠹蟲余分得小景一幅近邊一橋誤畫其半於毗連別幅上先生因戲題一絕曰秋徑老樹窮危坡坐愛閒雲過眼多畧約不須安對岸怕來俗客到山門一時傳爲佳話今不知落何月矣題詩自覺筆力減老夫亦已頭欲童

題田綸霞司農大通秋泛圖爲馮鷺庭編修

新城司寇詩無雙巧翻舊調成新腔門牆奔走天下士  
如齊晉楚雄諸邦節山居士獨相軋偏師馳突橫衝攔  
左右佩劍遞相詆至今兩部尋戈鏃於時脫屣門戶外  
長河田與吾邱龐龐公埽蹟坐嘯詠公餘惟對花一窗  
田公博麗特自喜龍文之鼎筆可扛雖愧盧前恥王後

肯屈陸海輸潘江如虬髯客扶餘國亦不攻剽亦不降  
當年聲望雖小減無言要勝言而唯此圖作在監兌日  
潞河攜客浮輕艘入室旣少操戈鄭縱談宜慮彎弓逢  
揮毫拈韻詩落紙飛觴催酌酒滿缸丹楓兩岸醉秋色  
綠波十里鳴寒瀧風流文采致足樂興酣吐氣橫天杠  
何必詩壇執牛耳岸然大將麾旌幢嗟我多年事筆硯  
自知性僻心愚惹戚施但可仰直鈎都盧一任飛緣橈  
今朝無意見此卷幾回夜讀挑殘缸風微人往百餘載  
零然高望猶踰躡

桂未谷簪花騎象圖

才人縱以官爲戲騎象簪花無此事先先生此畫吾了知  
聊明不薄炎荒意昔年曾讀驃國詩清平官亦工文詞  
從來六詔解聲律勿云烏語皆侏僂先生經學能稽古  
辨別形聲研訓詁定以詩書化百蠻風琴雅管成鄒魯  
他年續補樊綽書卷端合遺鐫斯圖閒中指點向親故  
作吏曾經此地居

劉石庵相國藏經殘帙歌

雙丸迅轉須彌頂盤古至今彈指頭生生滅滅萬恒沙  
問所以然都未省卽如妙蹟畱人間筆陣縱橫各馳騁  
昔金貞石有時銷片楮偏能傳世永此經斷裂蟲蝕餘

幾付丙丁剛遇拯如云佛力所保持何不全帙皆完帙  
或曰墨寶神摛詞胡不護惜張鍾等乃知贖此亦偶然  
一瞥電光仍幻景先生示我索我詩五十八首原井井  
佛法書法兩不知佳處安能一一領惟喜楮墨閱千年  
黯然古色如彝鼎風寒日短賓客稀展對暫游清淨境  
明窗朗朗近南榮斜照沈沈挂西嶺幾回卷束又重開  
哦詩不覺衣裳冷忽然有悟還自笑此如雁過長空影  
云何墮落文字禪夢中說夢猶難醒

以詩投諸友索和竟日無耗走筆戲促

諸君衮衮皆詩豪排突沈謝凌風騷河間傖父不量力

奮臂輕以偏師挑方看大將建旗鼓揚兵飛矢風雲交  
胡爲忽作閉門守竟高其壘深其濠母乃才似千鈞弩  
羞爲鼯鼠彎鳥號否則欲作國手奕棋以不著方稱高  
就中趙子尤健者縱橫自許劉與曹朝躡蠟屐探雲竇  
夜持藥玉酣松醪推蓬偃蹇氣蓋世狂呼往往驚潛蛟  
胡不百篇但斗酒瑟縮不畏山靈嘲僕今躍馬再摩壘  
請君一奮七尺刀不然徑可遺巾幘便呼舟子搖輕舠

祈湖佑中東田各以和章見示春礪詩亦踵至疊  
前韻賦謝

翩翩書記皆雄豪揮毫落紙風刁騷天生雲錦自五色

花紋不待絲絲挑昨與詩敵決勝負盤矛左右凡三交  
旁臨莊惠靜相對忘言忘象游於濠正如老鶴翔寥廓  
喔喔恥與家雞號偶然興到一長唳天風散入寒雲高  
清音忽遇謝吏部癡材自愧高敖曹雖然飲量一蕉葉  
卽吟亦欲傾村醪定有江神夜出聽赤虬前導驂青蛟  
臣朔滑稽固天性斂手安敢重詠嘲八閩才藪富珪璧  
雕劉正借昆吾刀論文把臂幸多暇不辭日日呼漁舸  
建陽城外謝疊山賣卜處

疊山信州兵敗竄賣卜於建陽據邑志今建  
溪驛前是其故處而徧檢藝文無一詩豈此邦



之人喜以理學相矜詡尊性命而薄事功流弊  
所至乃並忠孝薄之耶過其地爲補一詩亦紫  
陽表晉徵士之意云爾

一聲白雁江南秋六橋烟冷芙蓉愁霹靂夜繞鎮南塔  
杜鵑飛上冬青頭王孫芳草飄泊盡江海猶有孤臣畱  
疊山心事比信國竄身避地來閩甌垂簾聊作成都隱  
采薇亦是西山儔飢魂何處覓舊主殘碑終古鄰山郵  
韓陵片石堪共語詩人宜向奚囊收手披邑乘六七過  
竟無一語當何由陶潛大書晉徵士綱目實繼麟經修  
紫陽家法今尙在後儒胡不承箕裘我行過此三歎息

徘徊俯視漳灘流河聲亦似氣鬱怒寒濤澎湃風颼颼  
竹下閒行有懷

竹徑秋風急琤然鸞鳳音枝高時動影葉薄不成陰我  
有王猷興徘徊盡日吟因憐空谷裏翠袖暮寒深

次韻張晴溪孝廉遊盤山

蕭灑張公子尋幽上翠微山光春染黛雲氣曉生衣路  
轉千峯合泉鳴一練飛桃花正相待濃露未全晞

王菊莊藝菊圖

東籬千載後癖嗜似君無以菊爲名字隨花入畫圖秋  
深人共淡香晚韻逾孤可要王宏輩重陽送一壺

蘇虛谷墨竹

曾記湖州派親傳玉局翁至今老孫子仍有舊家風意  
出叔樞外神畱蕭瑟中平生疎落性原與此君同

送朝鮮使臣柳得恭歸國

古有雞林相能知白傅詩俗原嫻賦詠汝更富文辭序  
謝三都賦才慚一字師惟應期再至時說小姑祠

送朝鮮使臣朴齊家歸國

賁篋趨王會詩囊貯使車清姿真海鶴秀語總天葩歸  
國憐晁監題詩感趙驂他年相憶處東向望丹霞

爲伊墨卿題劉文正公墨蹟

功業留青史寧因翰墨傳偶然觀舊蹟亦足想當年丰采瞻前輩收藏藉後賢好將心正語記取柳誠縣

銀粉多殘蝕毫端尚有稜憶同王大令深論趙吳興記石

庵先片紙存今日諸天隔幾層記願君德懋語白頭門下士感

慨意難勝

### 送桂未谷之任滇南

地遠山水僻滇南俗最淳將求司牧者合用讀書人政暇仍稽古官清自耐貧向來餐苜蓿本似棣州陳

秋風吹萬里送子宦天涯驛路今無梗山城亦自作琴

餘披訟牒吏散靜衙齋漁隱編叢話應能手自排桂苑古今

詩話成數十巨  
冊方事編纂

寄董曲江

五緯宵明壁府寬風雲翕合競彈冠相攜諸子蓬萊島  
時憶先生肯藉盤名士爲官原灑落詞人垂老半飢寒  
祇應雪夜哦新句且付彭城魏衍看

對雨有作呈錢少司寇

匝地陰雲晚未晴蕭然獨坐閉柴荆天涯芳草愁相憶  
塵匣瑤琴澀不鳴夢裏園林騎馬路病中風雨賣花聲  
玉泉上下芙蓉渚一夜新流幾尺生

送郭石洲歸洛陽

風起廬溝萬柳斜河梁欲別曉曉鴉天涯春盡憐芳草  
遠道人歸過落花游土真成蘇季子少年珍重賈長沙  
含情一片長安月夜夜隨君共到家

題雪溪墨竹

襴褌一丈青鸞尾何人縮入尺幅中可憐隨手暈淡墨  
尙令撲面生清風亭亭自倚瘦石立落落一掃凡葩空  
嵇康阮籍都不畫入林肯著王安豐

懷朴齋家

偶然相見卽相親別後恩恩又幾春倒屣常迎天下士  
吟詩最憶海東人關河兩地無書札名姓頻年問使臣

可有新篇懷我未老夫雙鬢漸如銀

壬戌會試閱卷偶作

三度來登鳳唼堂蕭疎兩鬢已如霜  
衰翁宜識新化樣往事曾吟古戰場  
陸贄重臨收吏部劉幾再試遇歐陽  
當年多少遺才憾珍重今操玉尺量

桃李霏香滿禁城春官又得放門生  
文章奧妙知難盡意氣飛騰亦漸平  
此日歐梅欣共事向來韓范本無爭  
諸公莫惜金鑱刮使我看花眼暫明

拭目挑燈夜向晨官奴莫訝太艱辛  
應知今日持衡手原是當年下第人  
誓約齊心同所願丁寔識曲聽其真

顏標錯認知難免，恕我明春是八旬。  
雖會辛苦檢書倉，四庫編摩老漸忘。  
稽古未能追馬鄭，論詩安敢斥蘇黃。  
曲江春宴花無數，遼海秋風淚幾行。  
多少遺珠收不盡，中宵輾轉漏聲長。

有感

百感蒼茫恨有思，鯽生曾忝鉅公知。  
八叉賦就真憐我，一瓣香焚卻爲誰。  
白髮甘心歸故里，黃泉畱面見先師。  
平生最薄樊南李，東閣題詩不再窺。

畱別及門諸子

祖帳青門握手頻，臨歧猶自語諄諄。

皇恩四度



持文柄遠道三年別故人天上鵷鸞懷舊侶

謂桐嶼雲房諸子

園中桃李待新春

謂惠叔等

明時稽古多榮遇努力京華莫

厭貧

卻寄舊寓葛臨溪姚星岩王覲光吳惠叔四子

幾載追隨擁絳紗只今雲雨各天涯  
新春定有重歸雁舊圃誰澆手種花  
敢道諸君長作客所憐此日半無家  
長安米貴吾曾記一夕關心鬢欲華

舟泊常州聞湖南撫軍將至

薄暮蕭然且賦詩冷官風味本如斯  
租來淮上船三板沾得蘭陵酒數卮  
寒犬爭畏新撥火啼鴉亂揀最高枝

一川冥色推篷望隱隱笳笳送畫旗

夜泊吳江

已是銀蟾挂柳梢纔收官舫泊塘坳昏烟欲合孤城閉  
遠水微明小港交寒鷺多情時近客栖烏貪睡懶離巢  
玲瓏方塔猶相伴一夜風鈴盡意敲

寄贈露園四首

四十年來兩鬢星蕭條生事太元經長楊羽獵無心賦  
載酒何人問草亭

松火談詩夜唱酬當年小宋憶同游王維早貴襄陽老  
俱是開元第一流

豐草長林老杜陵名場偶逐少年登騎驢日日長安市  
才有新詩上左丞

獵獵驚風雪打圍  
修侯城畔射生歸  
短衣匹馬何人識  
長嘯高原看落暉

書贈毛副戎

雄心老去漸頽唐  
醉臥將軍古戰場  
半夜醒來吹鐵笛  
滿天明月滿林霜

題陳氏端玉西齋遺藁

孤墳葬去一枝紅  
烟草年年泣曉風  
怪得此人多命薄  
香閨也被作詩窮

又悼田白岩

中儀

身後無兒感鄧攸  
烏絲零落付誰收  
行人多少山陽恨  
夜靜河聲入驛樓

富春至嚴陵山水甚佳

濃似春雲淡似烟  
參差綠到大江邊  
斜陽流水推蓬坐  
翠色隨人欲上船

烟水蕭疎總畫圖  
若非米老定倪迂  
何須更說江山好  
破屋荒林亦自殊

釣臺有感

歸然指點釣臺高  
隱士留名亦偶遭  
一樣清風辭漢主

更無詞客問牛牢

國朝龍輔詩集卷四十二終

國朝畿輔詩傳卷四十三

長洲陶

樑鳧薌輯

慶雲崔

旭曉林校

金玉岡

玉岡字西崑號芥舟天津人布衣有黃竹山房

詩鈔三十卷旧盤記游草一卷天台雁宕記游

一卷粵游草一卷

津門詩鈔芥舟先生高淡性成慕陶宏景林和靖之爲人工詩善畫白成一家遊屐徧天下名

山邃谷絕險巖幽俱留題咏晚遊羅浮卒於邑前輩鄭公熊佳電白縣署

紅豆樹館詩話芥舟野服幅巾江游海覽所至佳山水輒流連不去津門人士至今高之五言

佳句如殘燈秋雨驛衰柳夕陽橋老傷親故盡貧賦子孫多衰顏殘夢裏孤影亂山中枯藤寒

繫月遠火夜燒雲林鴉猶未起旅客已先行花  
陰封蝶蘭草色染蛙衣秋遞蟬聲苦風梳柳意  
涼春深山寺雨夜坐石樓燈捲簾通燕壘翔  
米散禽糧俱清切新逸不失晚唐人家數

### 過青縣

一夜孤篷雨新潮漲舊痕野航輕似葉小縣冷如村貼  
水編茅屋沿隄抱柳根又隨萍梗伴暫過酒家門

### 遊平陽

寒流縈石竇幽響靜中間梅塢數峯雪松根一杖雲茶  
留僧舍煮泉自竹溪分處處山蘭發無人氣自芬

### 彈琴

危坐忘言久焚香理素琴自疑枯木裏中有古人心情

其秋雲遠聲隨江水深興來時一曲不必有知音

法藏寺

層巒森古翠時有白雲封澗壑最深處煙霞第幾重僧  
棲一片石龍臥五株松到此塵緣絕空山叩午鐘

少林寺

青霄明玉笋隔嶺見浮圖漱石泉初響穿花徑欲無鶴  
棲雙樹老雲去一僧孤坐眺東風好何時共結廬

園居詩

園居如避世歲月道何成叉手看雲立無言繞樹行興  
來還獨醉老去漸忘情賸有愁根在年年白髮生



秋園獨酌

持螯傾白酒小閣蕩幽襟  
照水鶴憐影感秋蟲亂吟  
倦開花倚竹輕響葉辭林  
向晚鄰家靜天空聞遠砧

四月初一日過德州境

客行三月暮垂老尙辭家  
夢覺孤篷雨春殘野店花  
遠燈分蟹舍新漲沒鷗沙  
可有伊人感懷余水一涯

楚中懷古

故國芳洲草又新  
騷魂吟斷楚江春  
澧蘭沅芷思公子  
峽雨巫雲夢美人  
終古微詞誇宋玉  
何時哀怨返靈均  
賈生更向長沙去  
湘水投書共愴神

金陵懷古

石城王氣沒蒿萊結綺臨春又劫灰  
六代戰酣龍虎地  
一人吟上鳳凰臺  
大江浩渺寒流去故壘悲涼野月來  
太息蒼生誰再起年年王謝燕飛迴

曉過紹興城出都泗門

故家簾幙舊樓臺巖壑分明向北開  
水市留人嘗酒去  
碧山迎我過江來  
門遮冷翠家家竹窗吸空明岸岸苔  
怪底當年元九說謫居猶得住蓬萊

重別周道凝兼送別

寂寞分襟處春風各斷腸  
草堂人去後花落滿書牀

題畫

風露荒園夜螢飛草際  
鐙小蟲聲唧唧啼入豆花棚

秋夜

小窗蟋蟀語更殘  
助我閒吟到酒闌  
半壁清鐙秋夜永  
一聲黃葉墮堦寒

暮過甲馬營遇雨

一盞秋鐙黯不紅  
水煙昏黑斷歸鴻  
悠悠旅夢無憑處  
吹入寒塘夜雨中

秋夜

夜堂孤坐愁無際  
苦欲還山事未能  
堦下不知風露重

一庭蟋蟀語秋燈

題畫

橡葉疎黃柿葉紅  
蒼涼石徑自松風  
一筇扶我穿雲去  
數里寒山落木中

爲俞楚江題畫

何處容栽百本桑  
躬耕只合臥南陽  
買山欲贈緣無力  
聊爲先生畫草堂

爲陳對鷗畫津門送別圖送之廣陵

斜日津門一尺潮  
渡頭相送柳蕭蕭  
柔條得繫扁舟處  
知在邗江第幾橋

入房邑作

側坐青驢踏淺沙  
亂山影裏帽簷斜  
飛來小蝶頻爭路  
先我沿村看豆花

京邸口號

小雨疎花細柳條  
客懷都向醉中消  
青鞵踏徧長安市  
日訪殘書覓酒瓢

訪白龍潭

谷震雲崩萬壑雷  
飛流濺雪水縈迴  
山人指說修藤上  
時有蛟龍曝背來

畫梅寄章襄華

折得冰梢欲寄難  
海天東望路漫漫  
知君詩思清如許  
故寫梅花贈冷官

簡查松亭

蒙茸花竹繞貧家  
庭戶寥寥日又斜  
燕子不來簾似水  
遲君小院踏槐花

郊行

二月郊原煙雨多  
斜風觸處皺微波  
家家門外生春水  
草綠池塘泛白鷺

破帽

雨墊春吹破角巾  
簪花共醉幾回春  
半遮吟鬢蕭蕭處

頗稱疲驢背上人

後圃

廢圃荒荒摘晚瓜  
攜筐頻過野人家  
新寒先到孤村早  
秋雪滿灘蕎麥花

秋日

草蟲聲裏一窗開  
黃葉風埋雨後苔  
數點秋花寒欲落  
無聊蝴蝶更飛來

題自畫三友圖

松葉梅花相並清  
竹梢風撼石溪聲  
欲添孤月寒枝上  
凍折霜毫畫不成

秋庭

小窗幽夢出南華起汲新泉漱齒牙一樹冷雲吹不去  
滿庭黃雪落槐花

王淑向

淑向字漢儒若璉子開州人有斗室集

馬允剛序斗室集全學盛唐格律最正惟  
色澤稍枯音響未高故終以山林老耳

八十自壽

不悟無生悟有生八旬潦倒亦何情才疎未敢同流俗  
地僻惟知樂太平睡足衡門知夢穩扶來筇杖覺身輕  
榮枯有數由天定丹訣無勞問廣成



查善和

善和字用咸號東軒宛平人爲仁子有東軒詩

草

津門詩鈔東軒學問博雅善自韻晦好吟咏所著甚多

春日卽事和陳寄園甥韻

青袍襖不去綠鬢挽難留惜別君還別言愁我欲愁榮  
枯雲變態歲月水爭流何日花溪曲漁磯狎素鷗

早春攜鶴兒出郊

疲馬單裘出郭門繞隄得得又前村官卑春草欺袍色  
年長秋霜上鬢痕老僕攜茶行躑躅稚兒索果語溫存

繁華易惹青年恨風雪荒寒黯客魂

五十初度獨步郊外訪菊

帶索行歌自放顛菊花偏向野人妍小春荏苒剛三  
日暮景飛騰又十年聞道未深慚後起知非勉欲企前賢  
買臣苦爲驕妻子老著朝衣太可憐

張進思南歸葬親過沽上

離菊殘如病後身幾朝風雨暗煙津故人秋雁聲中到  
往事春婆夢裏塵負土有身真大事助舟無計坐長貧  
江南春曉如相訪宰樹連山宿草新

除夕

簷前星斗聯紅炬戶外更籌亂曉雞往事消如鴻踏雪  
新愁添似絮沾泥差爭蝸角遲貧宦長對牛衣有病妻  
偷得閒情付吟卷挑鐙重檢舊時題

雨聲

輕陰細雨作新涼點滴閒堦引興長準擬明年北窗下  
綠蕉斜種雨三行

張鯉

鯉字禹門號子魚撫寧人坦子監生

津門詩鈔禹門善書畫工詩文書學趙秋  
谷贊善畫法高且圓侍郎歿年三十九

過潘五哲堂亦歸書屋

巷陌依然過客稀  
綠蘿如幕障斜暉  
盈堦落蕊春前積  
挂壁蝸涎雨後肥  
綬刺幾曾容宇滅  
畫輪空自逐塵飛  
京華僕僕勞生地  
回首幽居志易違

張琯

琯字元白撫寧人埶子

河渚草堂宴集

花外溪頭別有莊  
幽人高築讀書堂  
怕經俗事門常閉  
愛逐貧交徑未荒  
業似游楊同立雪  
文如軾轍羨連牀  
鳴琴雅奏春醪潔  
一字詩成滿座香

閻條弟返津

國朝詩集卷之三  
老病頽唐步履遲每依南雁憶微之小春梅報歸來信  
定有懷人絕妙詞

趙思

思字五疇號補堂鹽山人諸生有嶺南集

饒郝坦中北歸

揮手送君去孤舟一水輕野花分早暮山氣辨陰晴別  
路應呼酒殘春自聽鶯布帆無恙在安穩到高城

周兆升

兆升字健南南宮人貢生官昌黎縣教諭有蘿

月軒集

南宮縣志兆升家貧好學天才俊逸肆力於詩

### 山村夜歸

薄暮耽幽景斜暉淡遠山嵐隨歸鳥盡人共倦雲還寺  
僻鐘聲歇林昏笛韻閒莫愁前路迴明月出柴關

### 朱繼善

繼善字孝本號舒園天津人嘉善弟貢生官蕭

### 孟縣訓導

津門詩鈔先生詩  
才清妙惜多散帙

### 九日袁碧澗邀同登高因留小飲

菊萼飄黃楓葉丹年光轉眼又秋殘西風蕭瑟頻吹帽

傑閣峻嶒共倚欄屈指幾回人事變開懷且任酒盃乾  
漫云冷宦無供給自有廚中苜蓿盤

康桓

桓字瑞公磁州人諸生

磁人詩先生詩學髣蘇字師  
顛米飲酒賦詩消遣世慮

通元谷

幽谷茅庵歲月閒相傳張果悟元關白雲深處青鸞隱  
一抹紅塵山外山

李汝襄

汝襄字滄涯祁州人貢生官三河縣教諭

雨後宿山莊

微雨山路滑迢迢來遠邨斜陽落沙嶼流水抱柴門風  
靜晚煙細鏗殘茅舍昏開簾見新月相對轉銷魂

螢

月黑長林忽有無熒熒欲認晚星疎照殘野店客衣暗  
點破碧紗窗影虛細雨樓臺新霽後秋風池館夜涼初  
蕪城往事成銷歇莫把流輝問玉除

王喬洞

洞口何方廣呀如復輿如只疑深窟裏藏有異人書

王應樸



應契號海峯任邛人諸生有珊瑚集

任邛縣志應契少負奇志欲徧覽山川名勝以親在不果後親歿竟出游不返所爲詩神似姚武功

紅豆樹館詩話海峯詩工五言邊徵君隨園嘗稱之句如明星懸似月古樹立如人村貧肥犬少寺廢老槐枯風迴花影合水靜月光圓揖僧殘寺角繫馬古槐根野曠人形小天清樹影齊百年平訟獄十室半詩書孤村連樹瘦荒草帶煙橫風格皆在四靈三拜之間

咏史

我愛龐德公家居襄水曲理亂直不聞樂道方未足豈真石隱流世濁遂遠辱乃復友諸葛功業敦相勗雲棲與涉川何妨各成局審茲燭理談胸懷真超俗視彼卞

務儔不翅珉與玉遙遙千載下誰能繼芳燭

### 村居

牢落村居靜終年聞見稀老農驚小吏熟犬吠新衣汲  
井晨尤迫芸田晚未歸人情多古處絕與市塵違

### 小春

天氣小春時寒生不可支木凋山露骨池凍水生皮  
火盈華屋香醪瀉玉卮聯吟欣有伴祇待雪催詩

### 舟中曉望

延眺愛朝景淩霜可泛舟波心浴孤日渡口淡清秋  
遠鳥煙中出纖鱗水上浮龍亭知近遠一棹入寒流

孫濂

濂字貢南號酒人磁州人諸生

含山縣旅夜

一載江湖客寒暄誰與論牀頭金已盡口內舌徒存空  
切原鴿嘆頻驚塞雁魂片雲隨處住歸夢繞柴門

留別葛棟南

喜得還鄉井歸途不計程關山孤劍冷行李一囊輕客  
夢隨江水歸心感笛聲恩恩分手去不盡是離情

枕上

醉後酣眠醒更遲北風吹雪滿疎籬擁衾不起非關嬾

枕上推敲未穩詩

杜休徵

休徵大名人諸生

村居雜詩

推敲垂老事高詠憶龐公去住忘賓主依違戀土風憂  
勞在隴畝歸宿等雲鴻心跡無人識年年守固窮  
泉石欣無恙栖遲此舊林布衣數來往蓬戶便追尋松  
月自長嘯竹風宜鼓琴世間榮辱事不入野人心  
幾家茅舍穩煙鎖夕陽樓蟋蟀那知暮蒹葭自作秋徑  
隨山勢轉水作瀑聲流投老多愁緒忘機羨白鷗

豈慮無衣甚風吹白露寒老知高臥好病怯薄遊難縱  
壑平生願依巖此日安秋英分數種佳色暮時看

過林慮

徙倚三峯麓寒凝水自清林疎頻見影谷靜欲無聲傍  
戶雙松立依泉片石迎望中煙樹渺老眼未分明

趙丹厓明府過訪山齋

捲地黃沙起迷天白晝昏人家爭閉戶城市寂如村花  
信移前約山光失舊痕燒鐙殘夜後猶自戀琴尊

杜昌言

昌言字諤堂靜海人貢生有浣花廬詩集

旅病

挂壁龕鐙不耐挑  
心旌摩壘正搖搖  
鯉魚風起音書斷  
一掬新愁傍夜潮

劉我愚

我愚字癡伯磁州人諸生

客中有感

天涯旅館對孤鐙  
何事霜催兩鬢星  
壯士自憐頭漸白  
窮途誰肯眼垂青  
年華荏苒駒過隙  
身世漂搖雨打萍  
不信干霄輸意氣  
匣中寶劍尙龍腥

曹听

昕字暘谷一字麗天號綺莊景州人有中田閒

吟一卷

紀昀序綺莊先生詩沈思怫鬱妙悟希微窮意  
象之欲生挾形神以俱往加以道家坎壈哀時  
命之不猶觸緒纏綿畔牢愁其誰語當其長  
愁養病惟寓於詩究以不樂損年竟溺於死  
李基塙五君詠之一暘谷幼失學嘲弄木天性  
一與蒼嶺遊潛心判雅鄭慷慨念遭逢纏綿托  
比興流傳少時  
作盤空排語硬

東園晚集酬露園秋厓右居兄弟

小園目就荒經歲不一窺落落幽居意宜復關下帷良  
朋懷古歡杖策相招攜還依綠蘿壁共傾明月卮幽籟  
取次發好風左右吹語往感前跡辨古覺後知侵涼夜

轉清交陰樹頻移風景并難忘言歸酬妙詞獎進敷情  
呢慕道託興微奕奕聯珠耀韡韡花萼輝伊余慚薄劣  
云何承清規凌晨理散帙向夕關荆扉尙持一尊酒聊  
待風雨期

偶作

孟郊多放言出門卽有礙門內苟足容焉須論門外斗  
粟出太倉春得五斗米汲少不任洶礫礫沙侵齒持荷  
難作梁牽蘿宜補屋園林多悲風花落棘成族孤興託  
窮蹟偏絃感獨難薄帷鑒明月中夜聞長歎

同申仙居遊安陵禪院贈月五上人



衛河迴岸午鐘沈  
福地清幽試共尋  
一徑莓苔迎客淨  
四時花木掩關深  
輕帆自幻風前影  
逝水難留定後心  
欲向已公參半偈  
蕭蕭松際已潮音

春日雜感

渴鳥啄冰冰盡開  
飛飛爭喚好春來  
誰人爲憶孤山鶴  
獨唳東風怨落梅

早暮惟聞鳥雀喧  
小桃紅帶已銜殘  
庭前欲探春消息  
二十四番風盡寒

吳孃曲

月極迢迢楓樹林  
白蘋花落暮江深  
夢迴更聽瀟瀟雨

一曲吳孃千里心

呂 淙

淙字亭育號石莊三河人布衣有秋岡書屋詩  
牋

晚秋登門雞臺

悲歌獨上門雞臺颯颯寒聲動地來  
流水冷浮黃葉去  
飄風晴捲白雲迴  
從軍謾說張侯劍  
作賦空思宋相才  
西下斜陽天又暝  
愁懷潦倒向誰開

張汝功

汝功字麗農南和人貢生官井陘縣教諭

隋碑歌次韓昌黎石鼓韻

昌黎昔日歌石鼓我亦欲作隋碑歌公筆力扛百斛鼎  
余材脆薄將奈何枯鐵空爾飽墨潘禿穎驚鈍慚霜戈  
是碑歷千一百載始斷山骨誰礪磨石質蒼潤肌理膩  
東西鼎足森駢羅兩峯對峙圭卓立其形有如大小峨  
碑東西各一白衣蒼狗變陵谷此碑幸不埋邛阿有明之世  
尙完好應賴好事爲護呵我曾得觀舊搨本字畫整齊  
無舛訛筆蹤驚絕劇生動厥體爲隸不爲蝌鵬怒鵬蹇  
勢飄舉芙蓉快刃剗蛟鼉方流圓折法好在槎枒古柏  
青銅刊陸離之文更光怪織以雲錦天孫梭呿擲鯨鼈

大瓊麗連衍阡陌何委蛇霜華古翠澗苔蘚儼湘紫竹  
斑皇娥刻石日紀石橋事盤空虹跨流滂沱開皇之年  
始創建系以涪州暨南和中郎已往尙有此延壽華嶽  
堪同科金石到處有遺跡得似碑者能幾多夫何年多  
遭淪落擅置荆棘悲銅駝碑頭日日噪鴉鵲蝸牛涎沫  
纏交過里兒紛紛不解事橫肆剗削爭磨磋頓使碑身  
長癡癬連珠洩玉俱靡波字敝石留石意古棲風住雨  
無偏頗嶧碑火燒岫嶠秘成毀有數誰知他繫余下士  
僻嗜好恥逐市僧爲姝媚腕劣雖愁有奇鬼鍾王墨妙  
常摩挲與碑相隔數百武時來拂拭生悲哦宋墓顏碑

尚晚輩

文貞公神道碑魯公書也

下視松雪真鶩鵝

那臺天寧寺虎照禪師碑吳興

書

歐趙集古不搜及坐教殘缺理則那虎豹之帶鳳鍛

羽腐選別脂死荆軻世間萬事類如此龍鵬偏靳遊江河我方瑀稊泣阮籍碑乎嗟爾同蹉跎

### 仙井臺晚坐

野濶秋風遠臺高坐翠微清潭雙鷺下古寺一僧歸雲漫沿河柳煙封隔岸扉徘徊憐日暮欲去且依依

金 勇

勇字果亭天津人貢生官鉅鹿縣訓導

津門詩鈔果亭先生少放曠不羈託於詩酒而天資超邁有石曼卿唐子畏之風

漳橋書望

落日漳橋望秋原動黍禾平橋歸棹緩衰柳暮鴉多遠  
火明殘戍疎鐘度晚波重懷沽上水風景近如何

王彥

彥字聞駿東光人諸生有醉吟集

黃公招飲卽席口占

沅芷湘蘭舊恨多  
羯來鼓缶興如何  
深慚濯濯三春柳  
幸沐汪汪千頃波  
綠映尊前喧笑語  
紅搖燭影動悲歌  
何當共泛秋江月  
醉裏題詩弔汨羅

孫湘

湘字漢南號一峯磁州人諸生

磁人詩公爲人曠達不羈氣岸豪舉好酒任俠兼善絲竹卒年四十二

丁未初夏視三弟於金陵先一日弟仍歸巢被羈

浦口寄書並附一絕

漂泊初停白下舟  
江干雁去水空流  
封書寄與還含淚  
釀得煙波處處愁

趙松

松字泰瞻號雲圃天津人貢生有偶存集

聞水西莊山桃盛開

風入名園春正深  
沿溪廊外好行吟  
已聞堤柳綠新染

又報山桃紅滿林載酒豈無前度興看花竟負去年心  
幾時閒共漁郎約一棹伊啞擬再尋

張映斗

映斗字南杓撫寧人瑄子貢生

思源莊落成同二弟拱之賦

思源莊在盧龍北今向津滄築草堂結構豈能如故里  
登臨權擬到家鄉須栽綠竹看新笋更種黃花待晚香  
素願與君何日遂耦耕隴畝老農桑

王一夔

一夔字孟夫號虞音大興人官湖南按察使



哭仲弟魯齋

垂死不相見寸心聞更悲銷魂長逝日異地哭君時雁序驚初斷家書恨已遲皇華方載咏辜負鵲鴿詩

拓地依蕭寺含酸過此門他鄉懸旅櫬何處賦招魂舊篋書仍滿儀牀硯尙存總帷風謾謾孤月冷黃昏

王一貫

一貫字魯齋大興人一夔弟諸生候選知縣

方苞序文登令王君虞音刻其亡弟魯齋詩大抵遠遊於山水之間嘯歌自適不事剽盜氣平而肯遠其傳誦于閭里固宜其行孝弟忠信其經濟藝術知名于時惜乎其沒也

阜城道中

平原薄暮望極目客愁生積雪連荒樹斜陽落古城斷  
魂遊子意歸夢倚閨情莫厭金門賦高堂重遠行

### 登金山

處處禪房靜層層古殿幽枯松懸絕壁怪石枕寒流巖  
穴煙霞暝江天草木秋塵襟不可浣對此思悠悠

### 秋日書懷

鳥語空庭人跡稀滿園秋色鎖荆扉離多易覺時光變  
懷遠都因心事違千里月明橫塞雁萬家砧急搗寒衣  
遙知處處青山瘦誰倚西風看翠微

### 秋夜話金陵舊事有感

王粲登樓恨未消秋風吹冷大江潮雁歸南浦無邊月  
楓落維揚第幾橋別路早辭金勒馬斷腸空憶玉人簫  
不須此日多惆悵滿眼黃花慰寂寥

雪中和耿二進士韻

昨夜西風昨夜寒篷窗朝啟雪漫漫玉人何處吹橫笛  
一路梅花落碧灘

堤上新柳

柳意纔黃綠尙遲晴江堤上一枝枝如今且莫開青眼  
正是春風別恨時

丹陽早發

水面無風細浪平  
沿隄日上曉煙清  
是誰喚醒朝來夢  
小槩青撈賣酒聲

鸚鵡店雨行

秋風吹客雨紛紛  
長路蕭條已十分  
隱約山村聞犬吠  
數行垂柳一溪雲

王一輔

一輔字翊亭大興人一夔弟官山西靈石縣知縣

暮秋

荒城人寂寞貧病誤居諸  
老圃經霜廢寒林映月疎  
還

家千里夢作客九秋餘汶汶應能受何須慮謫書

過顏灣口

望裏長安遠南征日又西湖寬村落小天淨白雲低古  
成臨河近官塘種柳齊櫓聲搖不住明月映前溪

堤上

遠山如黛亂雲屯水繞長堤樹繞村秋色滿園看不盡  
半天鴉影下柴門

遊聖照

聖照字希魯號雪舟任邳人貢生官開州訓導  
有雪舟詩稿

清夜

長夜漏迢迢深居閑寂寥世緣愁易散別緒恨難消  
霧隱千家靜霜寒萬木凋思家同杜老緩步立清宵

王履泰

履泰字亦安號若村大名人諸生有飲香草

倦客

倦客愁無睡虛窗耿欲明鄉心憐夢短殘月落高城  
物理何多故吾生太有情風軒枕席冷輾轉百憂生

蘇炯成

炯成字愛廬交河人諸生

秋日新莊懷吳練芳

郊原執手判西東  
路側踟躕恨別同  
底事荒村無限思  
長林松子落秋風